



WAN Jamal (tengah) menunjukkan rokok seludup pelbagai jenama yang dirampas dalam Op Loging.

Sorok rokok seludup belakang kaunter

Kota Bharu: Menyembunyikan rokok di belakang kaunter atau sudut tersorok dalam premis jualan sebelum dijual kepada pelanggan menjadi taktik peniaga rokok seludup.

Ada juga individu yang bertindak menyimpan timbunan rokok seludup di rumah terbiar dan didedarkan kepada pelanggan secara senyap-senyap.

Bagaimanapun modus operandi itu berjaya dikesan pasukan Jabatan Kastam Diraja Malaysia (JKDM) Kelantan yang menumpaskan kegiatan itu ketika Op Loging di Gua Musang, dekat sini, baru-baru ini.

Pengarahnya, Wan Jamal Abdul Salam Wan Long berkata, dalam operasi yang dijalankan bermula 10 hingga 13 November lalu itu, pihaknya berjaya merampas sejumlah rokok seludup pelbagai jenama dengan nilai rampasan ber-

jumlah RM315,708.75 termasuk cukai.

“Op Loging yang dijalankan baru-baru ini membolehkan serbuan di 16 lokasi berasingan sekitar kawasan Lojing, Gua Musang.

“Kami berjaya merampas sejumlah rokok seludup dengan nilai rampasan berjumlah RM73,062.36, manakala cukai terbabit adalah RM242,646.39.

“Turut ditahan 10 individu berusia antara 40 hingga 50 tahun yang disyaki pemilik premis untuk tindakan lanjut,” katanya dalam kenyataan media, semalam.

Wan Jamal berkata, rokok seludup itu dijual kepada penduduk tempatan yang terdiri daripada pekerja ladang termasuk warga asing dan barangan itu memang mendapat permintaan tinggi berikutan harga yang murah.